

Enno'sa' Kareta

Isens

Winipaino

Ekamanin

Enno'sa' Kareta Isens Winipaino esi iku'to' pe auro'kan nito' amuranu'sa' menukasa', "12 kaisaron kon iko' amu' tɔpataron kon koro'tawiri iye'ta'nu'sa' kon enakan." Imenukanin uya kipo'po'nan kuru ri main ekamanin apurisa' auro'kan nito' enpoikanin pe iku'to' pe auro'kan nito' pi', pu'ketu pi' miri awonsi'ki Kuri'san pe e'nito' eseru miri awonsi'ki ato'. Kuri'san pe e'nito' wini i'si'taino pi' isauro'sa' se warai'nan pi', imaminke' pe miri awonsi'ki i'ri para ri entu'ma' ri e'nito' pi', iri uya mo'kan nito', waku pe ato', isewaruma'ke' pe, apurito' miri awonsi'ki ikupu, ani apurito', pu'ketu, isipi' e'ni, mi pe e'ku'nito', miri awonsi'ki mi pe te'ku'sen pe para e'nito', turon kon eseru aimenka, utapurin nito' tauseta'kai' para e'nito', miri awonsi'ki ipureman nito' pi' isauro'sa'.

Enno'sa' kareta uya kuru ananpitu usennakan pe para ikupu esi apurito' pokon pe, Kuri'san pe e'nito' ekareei yau.

Iyawon Ekamanin

Ekamanin (1:1)

Apurito' miri awonsi'ki pu'ketu (1:2-8)

I'ri para entu'ma' e'ni miri awonsi'ki mamin (1:9-11)

I'tun miri awonsi'ki i'tupi'nito' (1:12-18)

Eta miri awonsi'ki ikupu (1:19-27)

Panaman tenu yawon ke e'ni namai' (2:1-13)

Apurito' miri awonsi'ki iturawasooi (2:14-26)

Kuri'san miri awonsi'ki iyani (3:1-18)

Kuri'san miri awonsi'ki non (4:1—5:16)

Iu'matu pe i'si'taino tu'kan ku'to' pi' ri auro'kan nito' (5:7-20)

1 Isens, Papa miri awonsi'ki Itepuru Sises Kurai poitoru winipaino,

12 kaisaron kon iko' amu' tɔpataron kon koro'tawiri iye'ta'nu'sa' kon enakan: Miyari'nokon.

I'tun Nito'

Miri Awonsi'ki I'tupi' Nito'

²Utonpa ton, pori' pe kuru e'ti', tu'kan ni i'si'taino ton i'tupi'nito' uye'sa' a'tai ipona'nokon, ³arune para i'tu auya'nokon apurito'

1:1 Ma'siu 13:55; Ma' 6:3; Inkupupu 15:13; Kare'siya 1:19

auya'nokon i'tupi'to' uya iyannawiri utin nito' kupu. ⁴Entakato' taturawasooi i'ma'kai, iyaku'pasa' pe miri awonsi'ki iyenuka'sa' pe iwesi kon pa, i'ri i'se pura ri. ⁵Ipu'ketu pura itonpa kon esi yau, Papa pi' nekama'poi, itanin amure' pe pura esii'ma tanporon kon ena', irepa iya ri miri, ipi' tausakorotai' pura. ⁶E'tane apurii'ma nekama'poi ikasimai'ma pura, apune pura kari ri ikasimai'ma ekama'ponin esi miri sipa'sipa parau po, pese'ti nuposi'manu nupininpanu kasa. ⁷Kari ri ka'pon ku'senuminkanin i'ri eporo tauya Itepuru winipai tukai'; ⁸ikasimanin pe kuru iyese miri, inkupunu esi miri petenan pe pura.

⁹Entu'manin akon wannu ne'kupui mi pe eke yau tesa pi'. ¹⁰E'tane imaminke' ne'kupui mi pe aiko pe tenasa' pi', apune pura wana' ipuru uma'ta kasa ima'tato' oton. ¹¹Apune pura wai enu uyepu punin ta'netu a'kiri, miri uya ite' seketanuku; itipuru uta'mo'ka, miri awonsi'ki itakorawanooi uma'ta. Miri kasa imaminke' uma'ta taturawasooi kupu iya koro'tau.

¹²Poru' kari ri ka'pon ti'tupi'to' entakanin, uko'man nito' arukooi, karon tato' epoto' iya oton, Papa nekama'pu kamoro ti'nunkanin nan pi'.

¹³“Papa uya i'tupi'nito' ya' utusa,” ku'kanin inu' ri i'tupi'nito' ya' te'tusa' a'tai, apune pura Papa esi i'tupi'nin pen iri ke, inu' ri i'tupi'nin pen kari ri; ¹⁴e'tane ka'pon e'turu i'tupi'nito' ya' iri i'se iye'to' wini, miri uya ri ipi'siku miripan epori'ma iri pi'. ¹⁵Miri a'tai si, iri i'se te'sen entusa' a'tai, iri ton eseru ku'nin pe, miri awonsi'ki si miri iri ton eseru usemo'kasa' a'tai, uma'tan nito' ya' ari iya.

¹⁶Kisenku'titau, utonpa ton nukwi. ¹⁷Tanporon waku ton miri awonsi'ki ipan ni waku ton repa nito' esi ka'tawini tauye'sen ka' a'kwarii Kuipunu winipai, tausensimasen pen a'kwaru'pu usensimapitu kasa. ¹⁸Teseru poro ne'nisa' iya i'napairon main awiri, tanporo wapiyaro' kon inkapu'san imunki amu' pe^a usen nito' kon pe inkapu'san koro'tau.

Eta Miri Awonsi'ki Iku'nin Pe E'nito'

¹⁹Utonpa ton nukwi, miri wenai i'tuti': Tiwi tanporon kon ka'pon amu' nesii inke pura etanin nan pe, tinin pi' tausauro'san pe, miri awonsi'ki tinin pi' tausakorotasan pe, ²⁰ka'pon sakorooi uya Papa e'to' i'se ipokena' pe uko'man nito' nepu pura iyese. ²¹Miri pe iyese pi', iri eseru miri awonsi'ki iri inonkati' eke pe iwoi'nokon na'ne',

^a 1:18 wapiyaro' kon inkapu'san imunki amu' pe; miri pe pura, imunki amu' pe kuru ri—Kiri' numenuka'pu uya, wapiyaro' kon inkapu'san ta. Main, Mosi' winon uya enupan i'ri amu' imurewato' ton miri awonsi'ki kiyari aku'pasa' anumu e'sara'ti esi Papa iwano' pe kuru ri, miripan esi itenawon pe kuru tasa'.

miri awonsi'ki mi pe te'ku'se p̄ra Papa Maimu ananti' iyewan kon ya', iye'pinka'sa' na'ne' ayau'nokon; main ipika'tinin kon pe kuru te'sen.

²²Wak̄u main awiri e'ti', etanin pe riken p̄ra. Miri a'tai, iiwano' kon pe iusenku'ti kon pen. ²³ɪn̄u' ri esi a'tai main etanin pe e'tane iku'nin pe p̄ra, k̄uri ri esi miri ka'pon, wanamari ya' tem̄u' ennin kasa, ²⁴miripan uti t̄ausene'p̄u t̄upo, inke p̄ra ri miri kasa tesi tukai' t̄ausene'p̄u pu'tika'n̄uku iya. ²⁵E'tane k̄uri ipoi ri tenu tut̄use wak̄u main, mo'kanin wann̄i ennin miri awonsi'ki t̄uuko'mansen seri kup̄u pi' t̄uneta'p̄u t̄upu'tika'n̄u'se p̄ra e'tane ikup̄u pi'—k̄uri ri uya wak̄u epoto' oton miri t̄unkup̄unu yau.

²⁶ɪn̄u' ri ka'pon esi yau Papa pokon pe t̄uuko'mansen pe te'ku'sen pe tani mainanpai'ma p̄ra, k̄uri ri usenku'ti miri awonsi'ki Papa pokon pe iko'manto' napurin̄u esi not̄un pe ri. ²⁷Wak̄u kuru esukenan miri awonsi'ki imaku'pi p̄n Papa pokon pe uko'man nito', Papa, uk̄uip̄unu kon e'to' i'se esi se kasa: piyapaino kon miri awonsi'ki itaan'p̄u ima'tasa' kon t̄umainanpai' to' usewankamato' yapai, iri seri non eseru uya t̄uma'tan̄u'to' apai niri te'mainanpa pe.

Tenu Yawon Ke E'ni Namai'no

2 ¹Utonpa ton, a'kwa yawon Uyepuru kon Sises K̄urai apurinin pe iwesi kon koro'tau, tenu yawon ke ke't̄au. ²Ka'pon

uyep̄u pe iyesi yau ayam̄rasa' kon koro'ta', kor̄u pun konekasa' irimuui pe, wak̄u ya' iye'pontipi'sa', miri awonsi'ki entu'manin, iri ri nin ipon niri uyep̄u. ³K̄uri kuru wak̄u pe iye'pontipi'sa' kup̄u auya a'tai wak̄u pe, “Se kuru wak̄u ayapon,” tai'ma ipi', entu'manin pi', “Mi airi e'soto'ka',” miri pe p̄ra, “Ereuta' non po u'ta piyau,” tai'ma. Miri ku'sa' auya'nokon a'tai, ⁴iye'menkasa' kon pe p̄ra pe' me'ku'at̄uu miri awonsi'ki eseru aimenkanin pe iyenasa' kon, ipoken p̄ra iri pe iusenuminka kon wini ri?

⁵Etati', utonpa ton n̄u'kwi: Papa uya pe' kamoro pata enu yau entu'manin nan pe te'san an̄nsa' p̄ra nai apurito' yau eke pe to' e'to' pe miri awonsi'ki isauro'sa' r̄u'p̄u, esa' wann̄i pe te'to' an̄nnin pe ti'n̄nkanin nan e'to' pe? ⁶E'tane entu'manin nan sapemasa' auya'nokon. Imaminke' ton pen pe' kamoro ikota'manin kon? Kamoro pen pe' kamoro ko't̄u ta' ipi'si'nin kon? ⁷Kamoro pen pe' kamoro eke ipi' iye'tusa' kon na'ne' ese' sapema pe t̄usauro'san pen?

⁸Eke, Itepuru maimu iye'menkasa' na'ne' itekare yau yawiri kuru iwesi kon yau, “ɪtonpa i'n̄nkaki, misi'n̄nkayai'ne' kasa,”^b tawon, ipoken iwesi kon miri. ⁹E'tane tenu yawon ke iwesi kon yau, aumakoita kon; Main, Mosi' winon uya nin si ama'tan̄uku kon miri, miri Main i'kwi'nin pe iwesi kon pi'. ¹⁰Ap̄ne p̄ra in̄u' ri tanporo Main

^b 2:8 Ripaiti'kas 19:18

yawiri na'ne! e'tane ri ita'mo'ka tikin nan yau ri esi miri iri pe, tanporo ri i'kwi'sa' iya pe. ¹¹Apune p̄ra k̄ri ri, “Iyemari'masa' k̄sekumankai,”^c tawon uya ri mari, “In̄' ri k̄winii,”^d tasa' esi. Iyemari'masa' ekumankanin pe p̄ra ri iwesi yau, e'tane iwisa' auya yau, main i'kwi'nin pe ri iyenasa' miri.

¹²Asauro'ti' miri awonsi'ki iku'ti', kamo Main, mo'kanin wanni yai, iteseru aimenkato' naimenkaton kon pe, ¹³apune p̄ra Papa uya eseru aimenka usenpoikato' oton usentu'man pe p̄ra k̄ri isentu'masa' r̄p̄u pen pona. Usentu'man uya eseru aimenka wapiya'ka miri!

Tapurisen

Miri Awonsi'ki Tuku'sen

¹⁴Wak̄u pe pe' iyese, utonpa ton, ka'pon e'kup̄u yau apurito' esa' pe e'tane i'ri ri kup̄u'ima p̄ra? Miri warai pe' apurito' uya ipika'ti? ¹⁵Utonpa kon, warawo' miri pe p̄ra uri'san esi yau ipon p̄ra, miri awonsi'ki w̄i kaisa ri inanam̄n̄u iti'kiyari p̄ra, ¹⁶itonpa kon uya ta pe iyese yau ipi', “Enta, wak̄u pe e'ki ukayai' ipi'; ikomi' pe p̄ra iko'manki, wak̄u pe mata're'tii'” e'tane i'ri kup̄u'ima p̄ra ri i'se iye'to' pi', wak̄u pe pe' iyese? ¹⁷Miri kasa ri, apurito' esi, ikup̄u uya isakon̄'ti p̄ra iyese yau, iyeri'sa' pe ri iyese.

¹⁸E'tane t̄ron ni uya ta poken iyese, “Apurito' esa' pe iwesi; iku'to' esa' pe esi,” ta.

E'tane ta uya nin, “Anapurin̄u ikup̄u'ima p̄ra enpoikaki uyena', miri awonsi'ki unapurin̄u ikup̄u'ima enpoikato' pe uya iyena',” tasa'. ¹⁹Apuri auya moron tikin nan ni Papa. Oso! Miri ri mari apurinin nan kamoro iri a'kwar̄u ton, isi'n̄ak̄u'ima ipi'!

²⁰Iya'kwar̄u p̄non imiri'nokon! In̄i'tupai pe' me'at̄u apurito' ikup̄u'ima p̄ra e'ni esi not̄un pe?^e

²¹Utamokori kon pe' Ep̄ra'an pi' ipokena' e' ta'p̄u pen pe' inkup̄u'p̄u wenai Aisi' t̄mu tusa' iya a'tai, Papa ena' use'man nito' apon po? ²²Ene auya'nokon inapurin̄u miri awonsi'ki inkup̄un̄u e'tarawasoma'p̄u isi'kaisa ri, miri awonsi'ki inkup̄un̄u uya nin si inapurin̄u enuka'n̄u'sa' miri. ²³Miri awonsi'ki itekare iye'menukasa' nin si uta'ku'tisa', “Ep̄ra'an uya Papa apuri'p̄u, miri pi' nin si ipokena' pe te'sen ta,”^f miri awonsi'ki Papa tonpa tukai' esa'sa' na'ne'. ²⁴Ene auya'nokon ka'pon koneka Papa uya wak̄u pe inkup̄un̄u wini, inapurin̄u wini riken pen.

²⁵Miri kasa ri, Reyapu, ekumanpi' te'sen pi' ipokena' e' ta'p̄u inkup̄u'p̄u wenai, ama'ai non ense'na itisa' kon apontisa' iya a'tai, miripan kon ennoko'p̄u iya

^c 2:11 E'sotas 20:14; Isu'taronomi 5:18 ^d 2:11 E'sotas 20:13; Isu'taronomi 5:17

^e 2:20 *not̄un pe*; miri pe p̄ra, *iyeri'sa' pe* ^f 2:23 Iseneses 15:6; 2 K̄rono'kurus 20:7; Aisaya 41:8.

2:21 Iseneses 22:1-14

taron ni awiri pi' pen pe'? ²⁶Pun, iya'kwaru pun esi iyeri'sa' pe kasa, apurito' tuku'sen a'kiri para esi iyeri'sa' pe ri.

Ani, Tenupansen Pen Ni

3 ¹Utonpa ton, ti'sa amu' pe esi i'se ke'tau, apune para uri'nokon enupanin nan pe te'san eseru aimenkato' oton miri ipan pe isi pe. ²Tanporo tu'kan yau ri tautamo'kasan uri'nokon. Inu' ri esi yau ipoken para te'sen pe para tausauroku yau, waku pe kuru iyese miri, tupun ni si esa' pe iyese.

³Kaware muta ya' itewa pu'ku tusa' a'tai, umaimu kon awiri iye'to' pe, tanporo ri kaware ra'ti miri. ⁴Miri pe para eke kanau amu' pi' i'tuti'. Eke ton pe ri iye'tane, pana'pan ni a'setun narinu pe, aiko ri e'se'tinin uya e'se'ti, anin e'to' i'se awiri itito' pe. ⁵Miri kasa si ani aiko ri pun pu'ku esi, e'tane eke pe tautapurisen. Isenuminkati' eke ri yu' epo'ti pi' aiko ri apo' e'sirinkasa' ke. ⁶Ani ri mari esi apo' pe, eke pe ri iri yen pe ri iyese upun kon pu'ku pe. Tanporo ri ka'pon a'si'sa' iya, iko'manto' eseru ri epo'tito' pe ikupu iya, miri awonsi'ki iyepo'ti ri apo', ekota'man pata'se' yau.

⁷Tanporon kon ni o' amu', toron amu', ene amu' miri awonsi'ki parau kawon kon ni ene amu', moro' amu' ri esi tenupansan pe, miripan kon ni enupankasa'

ka'pon uya, ⁸e'tane inu' uya ri ani enupanka para iyese. Tereutasen pen ni iri pe kuru ri iyese, eke pe ri eri'nu'kanin paisin yen pe iyese.

⁹Ani ke uyepuru kon miri awonsi'ki ukupunu kon apuripitu, miri awonsi'ki miri ke ri ka'pon amu' pa'nuku, Papa waraino kon pe ika'sa' kon. ¹⁰Miri ri muta apai apuripi'to' miri awonsi'ki e'pa'nu'nito' epa'ka. Utonpa ton, seri kuse'ku'nin! ¹¹Asa'ri ri mari pe' waku miri awonsi'ki ine'ne' tuna epa'ka poken nai miri ri mari tuna epa'kato' euta yai? ¹²Utonpa ton, pi' e' pe' epeta poken nai are' pe, miri pe para kure' e' pe' epeta poken nai pi' pe? Ine'ne' pe tepa'kasen tuna uya waku enpa'ka pen ni niri.

Asa'ron Tuponaron Ipu'ketu

¹³Inu' nai pu'kena' miri awonsi'ki ito'ka'nu'nin i'korotaunokon? Tiwi nenpoikai waku pe tauko'manto' eseru ke, mi pe te'ku'se para tankupunu ke ipu'ketu winipai tauye'sen. ¹⁴E'tane isi pe iyikintato' kon, amure' pe iwe'to' kon esi yau iyewan kon yau, ipi' katapuritu, miri pe para i'napairon pi' kasi kukatuu. ¹⁵Miri waraino ri ipu'ketu u'ti para iyese Epan poi, e'tane non winon ni, iya'kwaru pen ni, Makoi winon ni. ¹⁶Ikintan nito' miri awonsi'ki amure' pe e'pai e'nito' yau, isiporo para e'nito', tanporon ni iri ri ku'to' eporo miri, miri yau.

§ 3:11 *ine'ne'*, miri pe para *i'ne'*, miri pe para *isi*. (Apune, v. 12 niri enka'ki.)

2:25 Isa'suwa 2:1-21 3:9 Iseneses 1:26

¹⁷E'tane ipu'ketu, Epun poi tũuye'sen esi miri wapiya kuru esukenan ni, miri awonsi'ki tũusewankamai' pũra e'nito', tũusi'nũnkasen, tũron kon ennin, main awiron ni, isentu'kena' ri, eke ri waku ku'nin, te'menkasen pen ni, miri awonsi'ki i'napairon ni. ¹⁸Tũusewankamai' te'san i'ni'panũ'pi'nin nan, usewankaman nito' yau pũra te'pinsan uya ipoken e'nito' aku'pũsa' anũmu.

Papa Ena' E'nonkati'

4 ¹I'ri uya epanta'man isipi' e'ni emapu'ti i'koro'tau'nokon? Ipan pe i'se iwe'to' kon ayau'nokon na'ne' usewa'noman pi' yapai pe' iyepũ pen mi? ²I'ri ri i'se iwesi kon e'tane eporo auya'nokon pũra iyese. Iwenai iye'wini kon miri awonsi'ki i'ri ri enkuui pe iwesi kon, e'tane i'se iwe'to' kon eporo auya'nokon poken pũra iyese. Isipi' iwesi kon miri awonsi'ki iyepanta'ma kon. Eporo auya'nokon pũra iyese, apũne pũra Papa pi' ekama'po auya'nokon pũra iyese pi'. ³Ekama'po auya'nokon a'tai, eporo auya'nokon pũra iyese, apũne pũra iri pe iteseru esii'ma ekama'po auya'nokon, ineporo'pũ kon ma'tanũku ke ipan pe i'se iwe'to' kon ni kupũ pi'.

⁴Imiri'nokon temari'masa' kon e'tane tekumasan waraino kon ka'pon amũ, i'tu auya'nokon pũra

pe' iyese, orũ kupũ auya'nokon itonpa kon pe a'tai, Papa ewaruma'ti auya'nokon pe iyese? Inũ' ri orũ tonpa pe e'paino ena miri Papa eyaton pe. ⁵Miri pe pũra iusenuminka kon ni kati iye'menukasa' Papa Maimu uya ta iwenai pũra ri, "Iya'kwarũ uyau'nokon iko'manto' pe inkupũ'pũ esi tiwano' pe riken ui'se'nokon,"^h tukai'? ⁶E'tane eke pe miyari pari waku nonkasa' iya upona'nokon. Miri pi', iye'menukasa' Papa Maimu uya ta,

"Papa uya mi pe te'ku'sen

ewaruma'ti,

e'tane mi pe te'ku'sen pen

pona waku nonkasa'

turu iya,"ⁱ

ta iya.

⁷Miri pi' si, Papa ena' e'nonkati'. Makoi iwa'ku'ti', miripan ainũto' pe ipiyapai'nokon. ⁸A'ko pe Papa piya' isi'ti', a'ko pe ipiya'nokon iye'to' pe. Iyemiyatu kon ikumi'ti', tamakooikena' nan ka'pon amũ, miri awonsi'ki iyewan kon ikorũkati', ikasimanin ye' ton kuru. ⁹Aya'kwarũ kon tainũnpai' miri awonsi'ki tũuta'kwarũpi'se, tũuki'pi'nũnpi'se akaranti'. Auta'kirito' kon ensimati' tũuta'kwarũpi'se ukaran ni pe, pori' pe iwe'to' kon ipan pe iusewankono'ma kon pe. ¹⁰Mi pe te'ku'sen pe pũra enati' Itepuru rau, ayanũto' kon pe iya.

^h 4:5 Iya'kwarũ uyau'nokon iko'manto' pe inkupũ'pũ esi tiwano' pe riken ui'se'nokon; miri pe pũra, Papa esi ita'kwarũ uyau'nokon iko'manto' pe tũnkaa'pũ i'se tiwano' pe riken. ⁱ 4:6 Ipu'ketu 3:34 (LXX)

¹¹Utonpa ton, itonpa kon pi' iri pe isapema pe tausauro'se p̄ra e'ti'. Inu' ri iri pe isapema pe t̄utonpa pi' tausauro'sen, miri pe p̄ra iteseru aimenkanin usaurok̄u main, Mosi' winon pi' iri pe isapema pe miri awonsi'ki iteseru aimenka iya. Main eseru aimenka auya a'tai, iyawiri iwesi pen miri, e'tane iteseru aimenkato' auya po iyereuta. ¹²Moro tikin nan niken Main t̄unin miri awonsi'ki iteseru aimenkanin esi, k̄uri ri k̄uri ri t̄ameruntir̄u kenan ipika'tito' ike miri awonsi'ki ima'tan̄u'to' ike. E'tane si imiri—inu' pe iwesi itonpa eseru aimenka pa?

Awanapairon Pi' Utapurin

¹³Ap̄ne etati', imiri'nokon, “Seri pe, miri pe p̄ra awanapai ri se pata, miri pe p̄ra mi pata ya' utin miri, tikin ni w̄uipiya enno'se'na miri yau, p̄rata epoto' kup̄u pi' miri awonsi'ki p̄rata eporo pi',” tawon nan kon. ¹⁴I'tu auya'nokon p̄ra ri iyese i'ri e'kup̄u awanapai ri tukai'. I'ri mi iuko'manto' kon? Imiri'nokon esi kapuru' pe, aka'ne' pe ri t̄ausenpoikasen miri awonsi'ki tapasen kasa. ¹⁵E'tane ru'ku, “Itepuru eseru pe iyese yau, se, miri pe p̄ra mi kup̄u pi', uko'man ni'nokon miri,” tato' auya'nokon pe iyese. ¹⁶Na'ne' nin esi, mi pe iye'kup̄u kon miri awonsi'ki autapuri kon. Tanporo seri waraino utapurin esi iri

pe. ¹⁷Inu' ri, waku t̄ankup̄un̄u i'tunin, ikup̄u iya p̄ra na'ne' umakoita miri.

Imaminke' Ton Panamato'

5 ¹Ap̄ne etati', imiri'nokon imaminke' ton, akaranti' miri awonsi'ki t̄uuki'pi'n̄unpi'se akaranti', ap̄ne p̄ra usewankaman nito' uye'ni pi' man ipona'nokon. ²Imamin kon a'motasa' man, ene am̄u' uya ipon kon i'sa' man. ³Ikor̄u'i kon miri awonsi'ki isir̄upaai kon ukaranpi'sa' man. Seri ikaranpi'sa' uya apa'n̄uk̄u kon miri, miri awonsi'ki ipun kon ani iya apo' kasa. Eke pe kuru iimamin kon am̄uran̄u'sa' auya'nokon seri iweyu ton u'mat̄u yau. ⁴Enti'! Amainaru kon yau iye'turawasomasa' kon epe'p̄u, to' e'ma'p̄u auya'nokon p̄ra na'ne' ike ukaran ni pi' man apa'n̄uk̄u kon pe. I'kiyari kon ak̄u'p̄usa' an̄unnin n̄u'san ukaram̄u uya Merunti pe kuru te'sen ye' Itepuru pana eposa' man. ⁵Iuko'mansa' kon man seri non po eke pe ri iimamin kon tepose, miri awonsi'ki ipan pe i'se iwe'to' kon kup̄u pi'. Iyeka'pi'sa' kon iwini kon weyu a'taino pe.^j ⁶Iri ku'nin n̄u'san pen ni eno'ma'p̄u miri awonsi'ki t̄u'ka'p̄u auya'nokon, iyewa'nomanin kon pokena' nan pen ni.

T̄auseta'kai' P̄ra E'nito'

⁷Miri pi' si, t̄auseta'kai' p̄ra e'ti', utonpa ton, Itepuru uyep̄u p̄u'k̄u

^j5:5 iwini kon weyu a'taino pe; miri pe p̄ra, enta'nan weyu a'taino kasa.

pona ri. Apune temaina'tisen enti': tenuri'sen non uya epe'kena' kiyari epetanuku enupikiri, tauseta'kai' para te'sen tuna e'sara'ti miri awonsi'ki tuna iu'matu yawon enupikiri. ⁸Imiri'nokon niri tauseta'kai' para e'ti', pana' pe e'soto'kati', apune para a'ko pe Itepuru uye'to' man. ⁹Itonpa kon pi' te'naipi'se para, utonpa ton, iyaseru kon kuru nin aimenka miri. Eseru aimenkanin man mura'ta nau ri iye'soto'kasa'!

¹⁰Utonpa ton, tauseta'kai' para e'nito' ento' ipi' isi moronka a'taino pe, pu'kena' amu' enti', isauro'sa' kon Itepuru ese' yau. ¹¹Mi'tuyatui'ne' kasa ri, ipuremasa' pe to' esi ta, kamoro imoronkanin nu'san pi'. Isopu uya imoronkasa' ru'pu etasa' auya'nokon, miri awonsi'ki iu'matu pe ene'pu Itepuru nukupu'pu ru'pu. Itepuru esi eke pe tausentu'masen miri awonsi'ki aiko tawon ni.

¹²Miri entai kuru, utonpa ton, inku'ton kon pi' ausauroku kon a'tai Epan kusesa'tuu, miri pe para non ni, miri pe para i'ri ri. Tiwi, "Ewai," tato' auya'nokon nesii, ewai' pe ri; "Kane," tato' auya'nokon nesii, kane pe ri, iyeno'ma kon kuru nin miri.

Apurito' Yau Ipureman Nito'

¹³Itonpa kon ni na'ki nai ekamun yau? Tiwi nipuremai. Inu' ri pe' nai

pori' pe? Tiwi apuripi'to' eremu yai nuserenkai. ¹⁴Itonpa kon ni na'ki nai takuru'ke? Tiwi so'si epuru ton ki'mai tapona to' ipuremato' pe, miri awonsi'ki tukarapaimato' pe Itepuru ese' yau. ¹⁵Apurito' yau iyipuremasa' uya takuru'kenan epiti' miri; Itepuru uya ri i'mu'sa'ka. Imakoitasa' pe iyese' yau, ipi' ri usentu'man. ¹⁶Miri pe iyese' pi', itonpa kon pi' ri amakooi kon ekamati', miri awonsi'ki itonpa kon pona ri ipuremati', iusepi'ti kon pa. Ipokena' e' pe te'sen ka'pon ipurema esi miri ipan pe merunti pe miri awonsi'ki tawotori'pi ke.

¹⁷Iraisa esi'pu ka'pon uwarai'nokon ni. Iyipurema'pu tauta'kwarupi'se, tuna uye'pu para iye'to' pe, tuna uye'pu para si iyese'pu non amankanin pe osoruwawon pona a'sa'muyai wuipiya airi ri. ¹⁸Iyipuremaka'pu kanan, miri a'tai ka' awonsi'ki si tuna uyee'pu, miri awonsi'ki si non uya kiyari epetanuku'pu. ¹⁹Utonpa ton, tikin ni ri itonpa kon utano'ma pe iyese' yau i'napairon apai, miri awonsi'ki taron ni uya ina'po, ²⁰se nesii iyenu kon yau: Inu' uya ri tumakooikenan na'po ipokenan pen apai uya ipika'ti miri ima'tato' apai, miri awonsi'ki tu'kan ni makooi niponti iya miri.

5:11 Isopu 1:21-22; 2:10; Eren 103:8 **5:12** Ma'siu 5:34-37 **5:14** Ma' 6:13
5:17 1 Kin Amu' 17:1; 18:1 **5:18** 1 Kin Amu' 18:42-45
5:20 Ipu'ketu 10:13; 1 Pi'ta 4:8